



ОНЦГОЙ БАЙДЛЫН ЕРӨНХИЙ ГАЗРЫН ДАРГЫН ТУШААЛ

2024 оны 04 сарын 05 өдөр

Дугаар А/108

Улаанбаатар хот

Хүүхэд хамгааллын бодлого батлах тухай

Засгийн газрын агентлагийн эрх зүйн байдлын тухай хуулийн 8 дугаар зүйлийн 8.4, Гамшгаас хамгаалах тухай хуулийн 30 дугаар зүйлийн 30.1.4, 30.1.19, Хөдөлмөрийн тухай хуулийн 43 дугаар зүйлийн 43.3, Хүүхдийн төлөө үндэсний зөвлөлийн 2018 оны 03 дугаар тогтоол, Хөдөлмөр, нийгмийн хамгааллын сайдын 2022 оны А/110 дугаар тушаалыг тус тус үндэслэн ТУШААХ нь:

1. Онцгой байдлын ерөнхий газрын стратеги төлөвлөгөө (2021-2024 он) Зорилт 3-ын 3.2 дахь заалтыг хэрэгжүүлэх хүрээнд “Онцгой байдлын байгууллагын алба хаагчдын хүүхэд хамгааллын бодлого”-ыг хавсралтаар баталсугай.

2. Тушаалын хэрэгжилтийг хангаж ажиллахыг Онцгой байдлын ерөнхий газрын зохион байгуулалтын бүтцийн нэгж, төв, орон нутгийн Онцгой байдлын байгууллагын дарга, захирагч нарт үүрэг болгосугай.


3. Онцгой байдлын байгууллагын алба хаагчдын хүүхэд хамгааллын бодлогын хэрэгжилтэд хяналт тавьж, ажлын тайланг Онцгой байдлын ерөнхий газрын даргын зөвлөлд жил бүрийн 12 дугаар сарын 05-ны өдрийн дотор танилцуулахыг Хяналт шалгалтын газар (хурандаа Б.Батболд)-т даалгасугай.

ДАРГА
ХОШУУЧ ГЕНЕРАЛ



Г.АРИУНБУЯН

Онцгой байдлын ерөнхий газрын даргын
2024 оны 04 дүгээр сарын 05-ны өдрийн
А/1108 дугаар тушаалын хавсралт



ОНЦГОЙ БАЙДЛЫН БАЙГУУЛЛАГЫН АЛБА ХААГЧДЫН ХҮҮХЭД ХАМГААЛЛЫН БОДЛОГО

Нэг. Нийтлэг үндэслэл

НҮБ-ын Хүүхдийн эрхийн тухай конвенц, Монгол Улсын Үндсэн хууль, Хүүхдийн эрхийн тухай, Хүүхэд хамгааллын тухай, Гэр бүлийн хүчирхийлэлтэй тэмцэх тухай, Гэмт хэрэг, зөрчлөөс урьдчилан сэргийлэх тухай, Хөгжлийн бэрхшээлтэй хүний эрхийн тухай хуулиудын хүрээнд хүүхэд нийгмийн бүх орчинд, хүчирхийллийн бүх хэлбэр /дарамт, хүчирхийлэл, мөлжлөг, үл хайхрах явдал/-ээс хамгаалуулах эрхтэй бөгөөд насанд хүртлээ эцэг эх, гэр бүл болон төрийн онцгой халамж, хамгаалалтад байх шаардлагатай болохыг хуульчилсан.

Хөдөлмөрийн тухай хуулийн 43 дугаар зүйлийн 43.3 дахь хэсэг “Ажил олгогч нь ажил, амралтын цагийг зохицуулах, хөдөлмөр эрхлэлтийн уян хатан нөхцөл хэрэглэх зэргээр ажилтны ажил, амьдралын тэнцвэрийг хангахад дэмжлэг үзүүлэх, хамтын гэрээ, хөдөлмөрийн дотоод журамд тусгах замаар ажилтны хүүхдэд ээлтэй, хүүхэд хамгааллын бодлого хэрэгжүүлэх”, Хүүхдийн төлөө үндэсний зөвлөлийн 2018 оны 03 дугаар тогтоол, Хөдөлмөр, нийгмийн хамгааллын сайдын 2022 оны “Хүүхэд хамгааллын бодлогыг хэрэгжүүлэх үлгэрчилсэн заавар батлах тухай” А/110 дугаар тушаалаар байгууллагын алба хаагчдын хүүхэд хамгааллын асуудлыг тус тус зохицуулсан.

Онцгой байдлын байгууллагын алба хаагчдын хүүхэд хамгааллын бодлогыг хэрэгжүүлснээр хүүхдийг болзошгүй эрсдэл, хүчирхийлэлд өртөхөөс урьдчилан сэргийлж, эцэг эх, асран хамгаалагч, ажилтан, албан хаагчдын хүүхэд хамгааллын талаарх ойлголт нэмэгдэнэ. Байгууллагын орчинд хүүхдэд ээлтэй орон зай бий болно. Алба хаагчдын хүүхдүүддээ санаа зовох байдал буурснаар ажлын бүтээмж нэмэгдэж, хамт олны дунд эерэг дулаан уур амьсгал бүрдэнэ.

Хоёр. Зорилго

Онцгой байдлын байгууллагын алба хаагчдын гэр бүл, нийгмийн хүрээнд хүүхдийн аюулгүй байдлыг хангах болон хүүхдийг эрсдэлтэй нөхцөлд орохоос урьдчилан сэргийлэх, хүчирхийллээс хамгаалах, хүүхдэд ээлтэй орчин бүрдүүлэхэд оршино.

Гурав. Хүүхэд хамгааллын бодлогын зарчим

- 3.1. Хүүхдийн эрхийг дээдлэн, нэр төрийг хүндэтгэх.
- 3.2. Хүүхдийн эсрэг хүчирхийллийн аливаа хэлбэрийг хүлээн зөвшөөрөхгүй байх.
- 3.3. Хүүхдэд хор хөнөөл учруулахгүй байх.
- 3.4. Ялгаварлан гадуурхахгүй байх.
- 3.5. Хүүхдийн дээд ашиг сонирхолд нийцүүлэх, нууцлалыг хамгаалах.
- 3.6. Хүүхэд хамгаалалд харилцан хариуцлага хүлээх, хүүхдийг хайрлах.
- 3.7. Эрсдэлийг тооцох, урьдчилан сэргийлэх.

Дөрөв. Хамрах хүрээ

Энэхүү баримт бичиг нь Онцгой байдлын байгууллагын нийт алба хаагч, ажилтан, сонсогч, гэрээт ажилтан, тэдний гэр бүлийн гишүүдэд хамаарна.

Тав. Алба хаагчдын мөрдөх ёс зүйн хэм хэмжээ, үүрэг

Онцгой байдлын байгууллагын удирдлага, алба хаагчид, болон бусад хүмүүс дараах ёс зүйн хэм хэмжээг мөрдлөг болгоно.

Ажилтан, алба хаагчдын хориглох зүйл:

1. Хүүхдийг цохих, зодох тусгаарлах зэргээр бие махбодын хүчирхийлэл үйлдэх;
2. Хүүхдийг гутаах, ичээх, доромжлох, дорд үзэх, нэр хоч өгөх, сэтгэл зүйн дарамт учруулах зэргээр сэтгэл санааны хүчирхийлэл үйлдэх;
3. Хүүхдийг садар самуунд уруу татсан үйлдэл гаргах, шалиг, зүй бус үг хэллэг хэрэглэж харьцах;
4. Хүүхдийн дэргэд зохисгүй үг хэрэглэх;
5. Хүүхэд хүчирхийлэлд өртсөн, аюултай нөхцөл байдалд орсон тохиолдолд мэдээлэхгүй орхих;
6. Хүүхдийн зураг, дүрс, мэдээллийг эцэг эх, асран хамгаалагчийн зөвшөөрөлгүй цахим сүлжээ (Фейсбүүк, твиттер гэх мэт)-нд нийтлэх;
7. Бага насны хүүхдийг асран хамгаалах хүнгүй, хараа хяналтгүй орхихгүй байх;
8. Бага насны хүүхдийг гэр, ажлын байр, автомашин болон бусад газар цоожлон орхихгүй байх;
9. Хүүхдийг харж асрах хүнгүй гол, мөрөн, нуур, тогтоол ус, уул хаданд явуулахгүй байх;
10. Ажилтан, алба хаагчтай хүүхдийн өмнө дээрэнгүй, зандарч харилцах, зүй бус хараалын үг хэрэглэхгүй байх;
11. Хувийн нууцад хамаарах мэдээллийн хувиар зөвшөөрснөөс бусад тохиолдолд байгууллага, албан тушаалтан, хувь хүнд хүүхдийн мэдээллийг өгөхгүй байх;

Байгууллагын хориглох зүйл:

1. Байгууллагын хүүхэд хамгааллын бодлогыг зөрчиж байгаа нь мэдэгдсэн боловч мэдээгүй мэт өнгөрөөх, нуун дарагдуулах;
2. Хүүхдийг ямар нэгэн хөдөлмөрт хөлслөх;
3. Эцэг эх, асран хамгаалагчийн зөвшөөрөлгүйгээр хүүхдийг урлаг, спортын арга хэмжээнд оролцуулах;
4. Ёс заншил, шашны болон зан үйлийн хэлбэртэй үйл ажиллагаанд оролцуулах;
5. Ажлын байр, хүүхдийн орчинд архи, тамхи сэтгэцэд нөлөөлөх эм, тариа, мансууруулах бодис хэрэглэх;

Хүүхэд хамгааллын талаар хүлээх үүрэг:

1. Байгууллагын ажилтан бүр хүүхдийн эсрэг аливаа хүчирхийлэл, мөлжлөгийн талаар байгууллагын удирдлага, эцэг эхийн зөвлөлд мэдээлэх, зөвлөл нь хүүхэд хамгааллын зөрчлийг хүлээн авах үүрэгтэй.
2. Ажилтан, алба хаагч хүүхэд хамгааллын ёс зүйн хэм хэмжээг зөрчсөн болон зөрчсөн байж болзошгүй үйлдэл, зан үйлийн талаар мэдээлэх.

3. Хүүхэд хамгааллын бодлогыг хэрэгжүүлэх нь Онцгой байдлын байгууллагын нийт албан хаагчдын үүрэг байна.

Зургаа: Зохион байгуулалт

6.1 Онцгой байдлын ерөнхий газар, түүний харьяа салбар, нэгж бүр хүүхэд хамгааллын асуудлаар ажиллах Эцэг эхийн зөвлөлийг байгуулж ажиллана.

6.2 Эцэг эхийн зөвлөлийг удирдах ажилтан, албан тушаалтны төлөөлөл бүхий 5,7,9-н хүний бүрэлдэхүүнтэй 1 жилийн хугацаатай байгуулна.

6.3 Эцэг эхийг зөвлөл нь улиралд 1 удаа хуралдах, шаардлагатай тохиолдолд төлөвлөгөөт бусаар хуралдаж болно.

6.4 Эцэг эхийн зөвлөл нь хийх ажлын төлөвлөгөөг 1 жилийн хугацаатайгаар гарган зөвлөлийн даргаар батлуулж, хэрэгжилтийн тайланг жил бүрийн 11 дүгээр сарын 10-ны өдрийн дотор Хяналт шалгалтын газар, Хяналт, шинжилгээ үнэлгээний асуудал хариуцсан нэгжид тайлагнана.

Долоо. Хэрэгжүүлэх үйл ажиллагааны чиглэл

Онцгой байдлын байгууллагын хүүхэд хамгааллын бодлогын хүрээнд дараах үйл ажиллагааг хэрэгжүүлнэ. Үүнд:

7.1 Урьдчилан сэргийлэх:

7.1.1 Алба хаагчдад хүүхдийн эрх, аюулгүй байдал, хүүхдийн онцлог, хэрэгцээ, шаардлага, цахим халдлагаас урьдчилан сэргийлэх сургалт, нөлөөллийн арга хэмжээг 4-өөс доошгүй удаа үе шаттайгаар зохион байгуулах.

7.1.2 Алба хаагчдын гэр бүлийн хүчирхийлэл болон хүүхдийн хүчирхийлэл үйлдэгдэж байгаа эсэх, хүүхдүүдийн талаар дэлгэрэнгүй судалгааг гаргаж, хариу арга хэмжээ авах.

7.1.3 Сургуулийн орчинд эцэг, эхийн эргүүлд томилогдох үед, эцэг эхийн хуралд алба хаагчдыг ажлаас чөлөөлөх.

7.1.4 Эцэг, эх нь хоёулаа албанд хамт ажилладаг алба хаагчид, Эмэгтэй алба хаагчдыг 7 хоногийн 1 өдөр ажлын богиносгосон цагаар ажиллуулах.

7.1.5 Хөгжлийн бэрхшээлтэй хүүхэдтэй алба хаагчдын хүүхдүүдийг бэрхшээлийн төрлөөс хамааруулан жилд 1-ээс доошгүй удаа эмнэлгийн үзлэг оношилгоо, сувилал, хөгжлийн бэрхшээлтэй хүүхдийн сэргээн засах хөгжлийн төвд хэвтэхэд дэмжлэг үзүүлэх.

7.2 Хүүхдийн аюулгүй орчныг бүрдүүлэх

7.2.1 Байгууллага дээр хүүхдийн өрөө, тасалгаа, цэцэрлэг байгуулах, хүүхдэд ээлтэй орчныг бүрдүүлэх.

7.2.2 Гамшиг, ослын дуудлага, албан томилолтоор удаан хугацаанд (5-аас дээш хоног) явж буй алба хаагчдын хүүхдийн аюулгүй байдалд анхаарал хандуулах, ар гэрт нь бололцоот дэмжлэг үзүүлэхэд анхаарах.

7.3 Мэдээлэх

7.3.1 Алба хаагчдын хүүхдийн эрхийн зөрчлийн талаарх мэдээллийг 24 цагийн дотор холбогдох байгууллага, хариуцсан хүмүүст нь албан ёсоор мэдэгдэнэ.

7.4 Арга хэмжээ авах

7.4.1 Хүүхэд дарамт, хүчирхийлэлд өртсөн буюу өртөж байж болзошгүй нь мэдэгдвэл хүүхдийг хамгаалах, дэмжиж туслах, ажилтнуудад хариуцлага тооцох арга хэмжээг даруй авах, дахин гарахаас урьдчилан сэргийлэх.

7.4.2 Зөрчил гаргасан алба хаагчдад албан тушаалаас үл хамааран дараах арга хэмжээ авна.

7.4.2.1 Холбогдох хуульд заасны дагуу хариуцлага хүлээлгэх.

7.4.2.2 Зөрчил гаргасан алба хаагчдыг албаны шагналд тодорхойлохыг хориглох

Найм. Нууцлал

8.1 Хүүхэд хамгааллын бодлогыг хэрэгжүүлж, хариу арга хэмжээ авч буй зөвлөл, бусад алба хаагчид гэр бүл, хүүхэдтэй холбоотой нууцыг задруулахгүй байх үүрэгтэй.

8.2 Алба хаагчдын гэр бүл, хүүхэдтэй холбоотой нууцыг задруулсан ажилтан, алба хаагчдад хуулийн хариуцлага хүлээлгэнэ.

Ес. Санхүүжилт

9.1. Улсын болон орон нутгийн төсөв

9.2. Орон нутгийн хөгжлийн сан

9.3. Олон улсын байгууллага, хандивлагч орнуудын зээл, тусламж, төсөл, хөтөлбөр

9.4. Төрийн болон төрийн бус байгууллага, аж ахуйн нэгж, иргэдийн тусламж, хандив

9.5. Хуульд заасан эх үүсвэр

Арав. Хяналт үнэлгээ

10.1 Байгууллага нь салбар, нэгжийн хэмжээнд хүүхдийн эрхийг хангах талаарх төрийн бодлогыг хэрэгжүүлэх ажлыг нэгдсэн удирдлагаар хангах, хүүхдийн хөгжил, хамгааллын чиглэлээр хийсэн ажил, түүний чанар, үр нөлөө, зарцуулж байгаа төсөв хөрөнгийн зардлыг жил бүр тооцож ажиллана.

10.2 Хяналт шалгалтын газар, Хяналт, шинжилгээ үнэлгээний асуудал хариуцсан нэгж нь Онцгой байдлын байгууллагын алба хаагчдын хүүхэд хамгааллын бодлогын хэрэгжилтэд хяналт тавьж, ажлын биелэлтэд жил бүрийн 11 дүгээр сарын 25-ны өдрийн дотор үнэлж, дүгнэн Онцгой байдлын ерөнхий газрын даргын зөвлөлд танилцуулна.

Арван нэг. Бусад

Нийт ажилтнууд, шинээр ажилд орж байгаа болон дадлагажигч ажилтан, оюутан, сонсогчдод Онцгой байдлын байгууллагын алба хаагчдын хүүхэд хамгааллын бодлогыг танилцуулна.